



Los ntawm Thawj Tswj Hwm
Thomas S. Monson

Kev Sib Tw Khiav hauv lub Neej No

Peb tuaj qhov twg tuaj? Vim li cas peb thiaj los nyob hauv no? Peb yuav mus nyob qhov twg tom qab peb tuag? Yeej muaj lus teb rau cov lus nug uas tib neeg sawv daws muaj no.

Kuv cov kwv tij thiab cov muam, tag kis no kuv xav qhia nej txog tej kev tseeb uas kav mus ib txhis—tej kev tseeb uas yuav pab peb lub neej thiab coj peb rov qab mus dawb mus huv txog peb tsev.

Txhua qhov txhia chaw, tib neeg khiav mus ub mus no zom zaws. Muaj tej dav hlau uas xa tib neeg thoob plaws ntiaj teb no hla tej dej hiav txwv mus ua lag ua luam, ua hauj lwm, mus yos teb chaws, los sis xyuas kwv tij neej tsa. Muaj tej kev qhov txhia qhov chaw—tej kev loj thiab me uas tsheb taug, muaj neeg coob heev uas tsav tsheb tsis tu tsis tseg khiav lawv tej hauj lwm txhua txhua hnuv.

Thaum muaj ib lub neej uas tsis khoom kiag li no peb puas siv sij hawm los nres thiab ntsuam xav txog ub no—puas nco qab xav txog tej kev tseeb uas yuav kav mus ib txhis?

Thaum muab tej kev tseeb uas kav mus ib txhis piv rau tej lus nug

thiab tej yam uas yus niaj hnuv ua, ua neej nyob no tsis tseem ceeb dab tsi li. Hmo no peb yuav noj dab tsi? Peb yuav tau thas xim dab tsi rau peb hoob nyob? Peb puas yuav cia Johnny koom pab ncaws pob ntawd? Tej lus nug zoo li no thiab lwm cov lus nug tsis tseem ceeb dab tsi thaum twg peb muaj teeb meem loj hauv peb lub neej, thaum ib tug neeg uas peb hlub raug mob, thaum ib tse neeg uas noj qab nyob zoo pib muaj mob muaj nkees, thaum lub neej no yuav xaus thiab yuav tso lub neej no tseg. Thaum ntawd peb haj yam txawj xav, thiab peb txawm muaj cuab kav txiav txim seb qhov twg thiaj tseem ceeb thiab yam dab tsi tsis tshua muaj nqi.

Tsis ntev tas los lawm kuv tau mus xyuas ib tug poj niam uas muaj mob loj heev tau ob xyoos no. Nws hais tias ua ntej nws pib mob, nws ua tej yam zoo li tu nws tsev kom zoo nkauj heev thiab teeb tej rooj tog zoo nkauj hauv nws tsev. Nws tau mus xyuas

tus kws kho plaub hau ob zaug txhua lub lim piam thiab tau siv sij hawm thiab nyiaj txiag yuav khaub ncaws tshiab txhua txhua lub hlis. Nws tsis tshua caw nws cov xeeb leej xeeb ntxwv tuaj xyuas nws vim nws txhawj tsam lawv ua rau nws tej khoom tawg los sis puas tsuaj vim cov me nyuam yuav tsis ua tib zoo kov.

Ces nws txawm tau zaj xov hais tias tej zaum nws yuav tso lub neej no tseg thiab tias tej zaum nws yuav tsis ua neej nyob ntev mus. Nws hais tias thaum nws hnov tus kws kho mob qhia tias nws muaj mob li cas, nws txawm pom nws lub neej khav lawm, thiab nws txawm paub tias nws yuav siv tag nrho nws lub sij hawm uas nws tshuav no nrog nws tsev neeg thiab cov phooj ywg thiab yuav muab txoj moo zoo tso nruab plawv nws lub neej, rau qhov tej ntawd yog tej yam tseem ceeb tshaj plaws rau nws.

Peb sawv daws yeej muaj tej lub sij hawm thaum peb pom kev khav npaum li ntawd thiab, txawm tias peb tsis raug tej yam xwm txheej zoo li ntawd. Peb pom khav hais tias tej yam twg hauv peb lub neej thiaj tseem ceeb thiab peb yuav tsum ua neej nyob li cas.

Tus Cawj Seej hais tias:

“Nej tsis txhob khaws nyiaj txiag thiab qhov txhia chaw rau nej hauv ntiaj teb no, rau qhov hauv ntiaj teb no muaj ntsaum kab rwg thiab xeb noj, thiab muaj tub sab nyiaj:

“Tiam sis nej cia li khaws nyiaj txiag thiab qhov txhia chaw cia rau nej saum ntuj ceeb tsheej, qhov ntawd tsis muaj ntsaum kab rwg thiab xeb noj, thiab tsis muaj tub sab nyiaj:

“Vim nej tej nyiaj txiag nyob qhov twg, nej lub siab yeej yuav nyob qhov ntawd.”¹

Thaum peb muab lub neej no xav mus xav los los sis muaj teeb meem ntau, tib neeg lub siab yuav tig mus rau saum ntuj, xav tau lub ntuj txoj kev pab teb cov lus nug tseem ceeb tshaj plaws uas hais tias: *Peb tuaj qhov twg tuaj? Vim li cas peb thiaj los nyob hauv no? Peb yuav mus nyob qhov twg tom qab peb tuag?*

Yus nrhiav tsis tau cov lus teb rau cov lus nug no hauv cov tsev kawm ntawv tej ntaub ntawv los sis xyuas hauv Internet. Cov lus nug no loj dua lub neej no. Tej no hais txog lub neej uas nyob mus ib txhis.

Peb tuaj qhov twg tuaj? Nov yog ib lo lus nug uas txhua tus neeg muaj, txawm tias nws tsis hais qhia tawm los xij.

Tus Thwj Tim Pov Lauj qhia cov neeg Athees saum lub roob hais tias “peb yog Vajtswv cov me nyuam.”² Vim peb paub hais tias peb lub cev nqaij daim tawv los ntawm peb niam txiv hauv ntiaj teb no, peb yuav tsum kawm seb Pov Lauj cov lus no txhais tau li cas tiag. Tus Tswv qhia tias “tus ntsuj plig thiab lub cev thiaj yog neeg.”³ Yog li ntawd tus ntsuj plig thiaj yog Vajtswv yug. Tus kws sau phau Hinplus hais tias Nws yog “Leej Txiv rau cov ntsuj plig.”⁴ Tag nrho tib neeg sawv daws thiaj yog Nws “cov tub thiab cov ntxhais.”⁵

Peb pom tau hais tias cov kws sau paj huam uas tau kev tshoov siab tau sau tej xov rau peb xav txog qhov no. William Wordsworth sau qhov tseeb hais tias:

Peb txoj kev yug los tsuas yog kev tsaug zog thiab tsis nco qab qhov qub;

Tus Ntsuj Plig uas nyob hauv peb lub cev, zoo li ib lub Hnub Qub, Tau muaj sia nyob puag ua ntej yug los,

*Thiab tuaj deb deb tuaj mog:
Peb tsis hnov qab txhua nrho,
Peb tseem npaj siab tos,*

Rau qhov peb los saum ntuj ceeb tsheej los

*Los ntaum Vajtswv lub tsev los:
Ua me nyuam mos liab peb tseem paub txog lub ntuj ceeb tsheej!*⁶

Niam txiv xav txog lawv txoj kev lav ris kom qhuab qhia, txhib, thiab coj qhia thiab ua yam ntxwv. Thiab thaum niam txiv ntsuam xav seb, cov me nyuam—feem ntau yog cov tub thiab ntxhais hluas—uas nug lo lus nug tob tob hais tias Vim li cas peb nyob no? Feem ntau, tsuas hais rau lawv tus kheej thiab hais tias, Vim li cas *kuv* nyob no?

Peb yuav tsum muaj kev ris txiaj npaum li cas vim tus uas Tsim peb tau npaj ib lub ntiaj teb thiab tso peb nyob no es tsis nco qab txog peb lub qub neej kom peb thiaj raug tau txoj kev sim siab, muaj cib fim qhia seb peb puas yuav ua zoo, xwv kom peb yuav tsim nyog tau txhua yam uas Vajtswv tau npaj tseg rau peb.

Tiag tiag mas, peb ib lub hom phiaj rau lub neej hauv ntiaj teb no yog kom peb yuav tau ib lub cev nqaij daim tawv thiab pob txha. Peb kuj tau txais lub txiaj ntsim uas yog kev ywj siab xaiv. Peb muaj hmoov vim peb muaj cai xaiv seb peb xav tau dab tsi. Nyob no peb kawm los ntawm tej yam uas peb ua yuam kev. Peb paub tau qhov zoo thiab qhov phem sib txawv li cas. Peb paub saj yam iab thiab yam qab. Peb kawm paub tias yus yuav raug tej yam xwm dab tsi thaum yus ua ib yam dab tsi lawm.

Thaum ua raws li Vajtswv cov lus txib, peb thiaj yuav tsim nyog tau “tsev” uas Yexus hais txog thaum Nws hais tias: “Kuv Txiv lub tsev muaj chaw ntau rau sawv daws nyob. . . . kuv tu tau chaw rau nej lawm . . . kuv nyob qhov twg nej yeej yuav nrog kuv nyob qhov ntawd.”⁷

Txawm peb los “saum ntuj ceeb tsheej los” rau hauv ntiaj teb no, lub neej no pheed mus lawm tom ntej. Cov me nyuam loj hlob ua tub thiab ntxhais hluas, thiab lawv maj mam tiav nkauj tiav nraug. Hauv peb lub neej peb kawm hais tias peb yuav

tsum ncav tes rau saum ntuj ceeb tsheej thaum peb ua neej nyob.

Vajtswv, peb Leej Txiv, thiab Yexus Khetos, peb tus Tswv, tau pua kev rau peb taug kom ua neeg zoo tag nrho. Nkawd caw peb los ua raws li tej kev tseeb thiab ua neeg zoo tag nrho, ib yam li Nkawd yog neeg zoo tag nrho.⁸

Tus Thwj Tim Pov Lauj muab lub neej no piv rau txoj kev sib twv khiav. Nws yaum cov neeg Hinplus tias, “Peb cia li muab txhua yam . . . kev txhaum uas khi peb tso pov tseg, thiab peb cia li sib tw khiav ncaj nraim mus kom txog tus ciam tom kawg.”⁹

Thaum peb rau siab ua peb yuav tsum nco qab tej lus qhia uas hais tias: “Cov neeg uas khiav ceev tshaj los yuav khiav tsis yeej txhua zaus uas muaj kev sib tw khiav, thiab cov neeg uas siab tawv heev los yuav sib ntaus sib tua tsis yeej lawm.”¹⁰ Tus uas tau lub nqi zog yog tus uas thev mus txog thaum kawg.

Thaum xav txog txoj kev sib tw khiav hauv lub neej no, kuv nco txog lwm txoj kev sib xeem khiav, li thaum ua me nyuam yaus. Kuv thiab kuv cov phooj ywg peb yuav muab ib rab riam coj los tw ntoo txua cov me nyuam nkoj. Ces mam li kho ib daim ntaub rau lub nkoj, ces peb mam li tso cov nkoj rau hauv tus Dej Provo uas khiav ceev ceev. Ces peb mam li khiav raws ntug dej saib cov nkoj hauv tus dej uas ntwis ceev ceev ntawd thiab tej thaum cov dej ntwis qeeb qeeb hauv cov dej uas tob.

Muaj ib zaug thaum sib xeem nkoj li no, peb pom hais tias ib lub nkoj ua txhua lub nkoj ntej thaum yuav txog qhov kawg. Ces txawm muaj lub yis dej uas rub lub nkoj ntawd, es ua rau lub nkoj ntxeev hlo. Nws kiv mus kiv los, tsis rov qab los txog nruab nrab tus dej ntawd. Thaum kawg nws cia li los tsoo tej ntoo thiab khiab nyiab ntawm ntug dej.

Cov nkoj me me uas peb txuas ntawd tsis yog nkoj khov kho, tsis muaj tus duav uas yus siv tsav lub nkoj, thiab tsis muaj lub cav. Tej no tsuas raws tus dej—raws txoj kev

yooj yim uas tsis muaj dab tsi thaiv lawv kev.

Peb tsis zoo li cov nkoj me no, peb muaj tej cwj pwm uas los saum ntuj los uas yuav coj peb kev. Peb tsis yog yug los hauv ntiaj teb no kom ntab raws tej kev yooj yim hauv lub neej no tiam sis peb yuav tsum txawj xav, ntaus tswv yim, thiab ua tej yam zoo.

Peb Leej Txiv Saum Ntuj Ceeb tsheej tsis xa peb los nyob hauv ntiaj teb no tsis muaj ib txoj kev txais Nws kev coj qhia kom peb rov qab los dawb los huv txog tsev. Qhov uas kuv hais no yog kev thov Vajtswv. Kuv kuj hais txog qhov uas peb hnov tau tus Vaj Ntsuj Plig Dawb Huv lub suab yaus yaus, thiab kuv kuj hais txog cov vaj lug kub dawb huv, uas muaj tus Tswv thiab cov yaj saub tej lus qhia—txhua yam puav leej no pab peb khiav mus tau txog qhov kawg.

Nyob hauv peb lub neej mas, yeej muaj tej thaum uas peb poob siab, peb qaug zog, los sis muaj mob muaj nkees—thiab laus zuj zus mus, thaum yuav txog lub caij nplooj ntoo zeeg hauv peb lub neej ces laus heev ces mam li tso lub neej no tseg.

Txhua tus neeg uas txawj xav tau nug tus kheej ib yam li Yauj thaum ub hais tias: “Yog neeg tuag lawm, nws puas yuav rov muaj sia?”¹¹ Txawm tias peb sim tso lo lus nug pov tseg tsis xav txog li, peb pheej xav txog. Tib neeg sawv daws yeej yuav tuag mus. Cov uas twb laus laus thiab qaug zog yeej yuav tuag. Tej thaum tib neeg uas tsis tau txog ib nrab lawv lub neej tseem yuav tso lub neej no tseg thiab tej thaum me nyuam yaus kuj tso lub neej no tseg thiab.

Tiam sis puas muaj ib lub neej tom qab kev tuag? Txoj kev tuag puas yog qhov kawg? Robert Blatchford, hauv nws phau ntawv *God and My Neighbor*, tsim txom cov neeg ntseeg Yexus tej kev ntseeg zoo li kev ntseeg Vajtswv, Khetos, kev thov Vajtswv, thiab qhov uas neeg tsis txawj tuag. Nws hais khav khav tias kev tuag yog qhov kawg tsis muaj lwm lub neej thiab tsis muaj leej twg uas hais tau tias qhov no muaj tseeb. Ces txawm

muaj ib qho txawv. Nws tej kev tsis ntseeg tau pib ploj mus. Sawv daws pom nws tej lus tsis tseeb nws tsis muaj chaw khiav nkaum. Nws maj mam taug kev rov qab los ntseeg txoj kev teev ntuj uas nws tau luag thuam thiab tau tso pov tseg lawm. Vim li cas nws thiaj pauv siab li no? Yog vim nws tus poj niam tuag lawm. Nws tu siab nrho thaum nws mus pom nws tus poj niam lub cev. Nws rov qab ntsia lub ntsej muag uas nws hlub heev. Thaum tawm los, nws hais rau ib tug phooj ywg hais tias: “Yog nws lub cev, tiam sis tsis yog kuv tus poj niam lawm. Txhua yam twb pauv lawm. Twb tshem ib yam dab tsi uas thaum i nyob hauv nws. Nws tsis zoo li qub. Dab tsi ploj lawm yog tias tsis yog nws tus ntsuj plig?”

Yav tom qab ntawd nws sau hais tias: “Kev tuag tsis zoo li ib txhia xav. Nws zoo li yus mus nyob hauv lwm chav tsev. Nyob hauv lwm chav tsev ntawd peb yuav nrhiav pom . . . cov poj niam thiab txiv neej thiab cov me nyuam uas peb hlub uas twb tso lub neej no tseg lawm.”¹²

Kuv cov kwv tij thiab cov muam, peb paub lawm hais tias kev tuag tsis yog qhov kawg. Cov yaj saub uas muaj sia nyob twb qhia li no hauv txhua lub caij nyoo. Kuj nrhiav pom li no hauv peb cov vaj lug kub dawb huv. Hauv Phau Ntawv Maumoos peb nyeem tau cov lus nplij siab uas hais tias:

“Nim no, hais txog saib tej ntsuj plig yuav nyob li cas nruab nrab txoj kev tuag thiab txoj kev sawv hauv qhov tuag rov qab los—Saib seb, nws raug ua rau koj paub lawm los ntawm ib tug tim tswv, tias tag nrho tej tib neeg tej ntsuj plig, thaum uas lawv ncaim ntawm lub cev uas txawj ploj txawj tuag no, muaj tseeb tiag, tej tib neeg sawv daws tej ntsuj plig, txawm yog lawv zoo los phem, tau raug coj mus tsev mus cuag Vajtswv tus uas tau muab txoj sia rau lawv.

“Thiab lub sij hawm ntawd yuav tau muaj tias, tej ntsuj plig ntawm cov uas ncaj ncees tau raug txais mus nyob rau hauv ib qho chaw zoo siab, uas hu ua yeeb tsheej, ib qho chaw

uas tau so, ib qho chaw uas muaj kev thaj yeeb, qhov uas lawv yuav tau so tseg tag nrho lawv tej teeb meem thiab tseg tag nrho tej kev txhawj, thiab tej kev tu siab.”¹³

Tom qab tus Cawm Seej tuag lawm thiab Nws lub cev nyob hauv lub ntxa peb hnuv lawm, tus ntsuj plig rov qab nkag mus hauv nws lub cev. Tau dov daim lag zeb mus, thiab tus Txhiv Dim uas sawv rov los tau tawm los, muaj ib lub cev nqajj daim tawv uas tsis txawj tuag lawm.

Yog xav teb tau Yauj lo lus nug uas hais tias, “Yog tias ib tug neeg tuag, nws puas yuav rov qab muaj sia nyob?” xav txog thaum Maiv Liag thiab lwm cov neeg uas tuaj txog lub ntxa thiab pom ob tug neeg uas ci ntsa iab uas hais rau nkawd tias: “Ua li cas nej tuaj nrhiav tus neeg ciaj ntawm cov neeg tuag no? Nws tsis nyob ntawm no, tiam sis twb sawv lawm.”¹⁴

Vim Yexus tau kov yeej lub ntxa, peb sawv daws yuav sawv rov qab los thiab. Nov yog txoj kev txhiv tib neeg dim. Pov Lauj sau hais tias: “Cov neeg saum ntuj lub cev zoo tsis thoov cov neeg hauv ntiaj teb no lub cev; cov neeg saum ntuj thiab cov neeg hauv ntiaj teb no lub cev nyias zoo nyias lawm ib yam.”¹⁵

Peb yeej xav tau lub yeeb koob xilethi-aus. Peb xav mus nrog Vajtswv nyob tas mus ib txhis. Peb xav nyob hauv ib tse neeg uas yuav nyob ua ke tas mus li. Tau tej koob hmoov zoo li no thaum peb rau siab ntso ua, nrhiav, hloov siab lees txim, thiab thaum kawg ua zoo.

Peb tuaj qhov twg tuaj? Vim li cas peb thiaj los nyob hauv no? Peb yuav mus nyob qhov twg tom qab peb tuag? Yeej muaj lus teb rau cov lus nug uas tib neeg sawv daws muaj no. Kuv hais tag siab tag ntsws thiab txo hwj chim los, hais lus tim khawv tias tej yam uas kuv hais no muaj tseeb.

Peb Leej Txiv Saum Ntuj Ceeb Tsheej zoo siab rau cov uas ceev Nws cov lus txib. Nws kuj txhawj txog tus me nyuam uas poob zoo, tus tub los sis ntxhais hluas uas tsis mloog lus, tus uas ua loj leeb, tus niam los sis

txiv uas tsis ua nws tej hauj lwm. Tus Xib Hwb zoo hais lus mos mos rau cov neeg no thiab rau sawv daws hais tias: “Cia li rov qab los. Cia li los saum no. Cia li los tsev. Cia li rov qab los. Los cuag kuv.”

Ib lim piam tom ntej peb yuav ua koob tsheej nco txog hnuv Easter. Peb yuav xav txog tus Cawm Seej lub neej, Nws txoj kev tuag, thiab Nws txoj Kev Sawv Rov Los. Ua ib tug neeg tim khawv tshwj xeeb txog Nws, kuv hais lus pov thawj rau nej tias Nws muaj sia nyob thiab Nws tos peb rov qab los. Kuv thov hauv Nws lub npe dawb huv kom peb yuav rov qab mus ntsib nws—es thov los ntawm Yexus Khetos, peb tus Cawm Seej thiab tus Txhiv Dim lub npe, amees.

LUS CIM

1. Mathais 6:19–21.
2. Cov Tub Txib 17:29.
3. Lus Qhuab Qhia thiab Kev Khi Lus 88:15.
4. Hinplus 12:9.
5. Lus Qhuab Qhia thiab Kev Khi Lus 76:24.
6. William Wordsworth, *Ode: Intimations of Immortality from Recollections of Early Childhood* (1884), 23–24.
7. Yauhas 14:2–3.
8. Saib Mathais 5:48; 3 Nifais 12:48.
9. Hinplus 12:1.
10. ej Lus Qhia 9:11.
11. Yauj 14:14.
12. Saib Robert Blatchford, *More Things in Heaven and Earth: Adventures in Quest of a Soul* (1925), 11.
13. Amas 40:11–12.
14. Lukas 24:5–6.
15. 1 Kaulethaus 15:40.

© 2012 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam tawm ua lus As Kiv: 6/11. Pub txhais ua lus Hmoob: 6/11. Kev txhais *First Presidency Message, May 2012*. Hmong. 10365 295

Kej Qhia rau Peb lub Caij Nyoog

Tej zaj lus qhia hauv pawg Pov Thawj Hwj Mekixedes thiab lub Koom Haum Niam Tsev tej kev sib ntsib thaum hnuv Sunday thib plaub yuav yog tsoom ntsoov tej “Kej Qhia rau Peb lub Caij Nyoog.” Txhua zaj lus qhia yus npaj tau los ntawm ib zaj los yog ob peb zaj lus hais los ntawm lub tuam rooj sab laj uas muaj tsis ntev tas los no (saib daim duab nram qab). Ceg txheem ntseeg thiab koog chaw cov thawj tswj hwm xaiv tau tej zaj lus hais uas tsim nyog siv, los yog lawv muab lub luag hauj lwm no tso rau cov npis sov los yog ceg ntseeg cov thawj tswj hwm xaiv los tau thiab. Cov thawj koj hais lus txhawb nqa qhov uas cov kwv tij hauv pawg Pov Thawj Hwj Mekixedes thiab cov viv ncaus hauv lub Koom Haum Niam Tsev kawm tib cov lus hais thaum tib hnuv Caij.

Tsim nyog cov mej zeej uas koom tej kev qhia no thaum hnuv Caij thib plaub kawm thiab nqa tuaj rau hooob kawm ntawv vaj lug kub tsab ntawv xov xwm uas muaj cov lus hais tom lub tuam rooj sab laj zaum tas los nyob haud.

Tej Tswv Yim rau Kev Npaj ib zaj Lus Qhia los ntawm cov Lus Hais

Thov Vajtsv kom tau tus Vaj Ntsuj Plig Dawb Huv nrog koj nyob thaum koj kawm thiab qhia txog cov lus hais. Tej zaum koj yuav xav npaj zaj lus qhia siv lwm yam ntaub

ntawv xov xwm, tiam sis cov lus uas tau hais tom lub tuam rooj sab laj yog cov lus kawm uas lub koom txoos twb pom zoo rau lawm. Koj lub luag hauj lwm no yog kom pab lwm tus neeg kawm thiab ua neej raws li txoj moo zoo raws li tau qhia tawm hauv lub Koom Txoos lub tuam rooj sab laj uas tau muaj tsis ntev tas los no.

Ke tshab xyuas cov lus hais ke nrhiav kom tau tej ntsiab cai thiab tej lus qhuab qhia uas yuav pab cov kawm zoo tshaj. Tsis tas li ntawd, ua tib zoo nrhiav kom tau tej dab neeg, tej nqes vaj lug kub, thiab tej lus los ntawm cov lus hais uas yuav pab koj qhia tej qhov tseeb no.

Npaj ib tug txheej txheem qhia kev saib yuav ua li cas qhia tej ntsiab cai thiab tej lus qhuab qhia. Xav seb puas nug ib co lus uas yuav pab cov kawm:

- Nrhiav kom tau tej ntsiab cai thiab tej lus qhuab qhia hauv zaj lus no.
- Xav saib tej ntawd lub ntsiab txhais li cas tiag.
- Qhia tawm tej yam uas koj to taub, tej tswv yim, tej yam uas muaj los rau koj, thiab koj tej lus tim khawv txog tej no.
- Qhia saib yuav ua li cas koj tej ntsiab cai thiab tej lus qhuab qhia no los mus siv hauv lawv lub neej.

QHIA LUB HLIS TWG	COV NTAUB NTAWV QHIA THAUM HNUB CAIV THIB PLAUB
Plaub Hlis Ntuj 2012– Kaum Hli Ntuj 2012	Tej zaj lus uas tau hais nyob hauv lub tuam rooj sab laj thaum lub Plaub Hlis Ntuj xyoo 2012*
Kaum Hli Ntuj 2012– Plaub Hlis Ntuj 2013	Tej zaj lus uas tau hais nyob hauv lub tuam rooj sab laj thaum lub Kaum Hli Ntuj xyoo 2012*

*Thaum qhia Hnuv Caij thib plaub hauv lub Plaub Hlis Ntuj thiab Kaum Hli Ntuj, xaiv tau tej zaj ntawm lub rooj sab laj tas los los yog lub rooj sab laj uas nyuam qhuav ua tiav laum. Cov lus hais no muaj txawm peem ua ntau yam lus nyob rau ntawm conference.lds.org.



Los ntawm Thawj Tswj Hwm Henry B. Eyring

Tus Pab Cuam Thib Ib hauv Thawj Pawg Thawj Tswj Hwm

Nce tej Roob

Yog tias peb ntseeg Yexus Khetos, yam nyuaj thiab yam yooj yim tshaj hauv lub neej no yuav koj koob hmoov los rau peb.

Muaj ib zaug kuv hnov Thawj Tswj Hwm Spencer W. Kimball thov Vajtsv hawv lub tuam rooj sab laj kom Vajtsv muab cov roob rau nws nce. Nws hais tias, “Muaj hauv lwm hnyav rau peb ua yav tom ntej. Kuv zoo siab hais tias tej yam no yuav los, thiab kuv txo hwj chim thov tus Tswv kom ‘muab lub roob no rau kuv,’ muab tej kev sim siab no rau kuv ua.”¹

Nov tau tshoov kuv lub siab lawm vim kuv paub tias Thawj Tswj Hwm Kimball tau raug kev nyuaj siab ntau. Kuv xav los ua neeg zoo li nws, thiab ua Vajtsv ib tug tub qhe. Tsis ntev tom qab ntawd, muaj ib hmo kuv txhos caug thov Vajtsv thov kom muab ib qho sim siab rau kuv. Kuv nco qab ntsoov. Kuv tau txhos caug hauv kuv chav pw muaj kev ntseeg loj tag npaud mas kuv xav tias kuv lub siab twb yuav tawg tas.

Ob peb hnuv tom qab ntawd Vajtsv tau teb kuv tej lus thov lawm. Kuv txais ib qho kev sim siab uas hnyav kawg uas ua rau kuv xav tsis thoob thiab txo hwj chim. Nov qhia kuv ob yam. Yam thib ib, kuv paub tseeb tias Vajtsv tau hnov thiab teb

kuv tej lus thov. Tiam sis yam thib ob, kuv pib kawm ua li cas kuv thiaj txaus siab them ntau npaum li cas los tau kom thiaj txais tej koob hmoov uas los thaum raug kev sim siab.

Txoj kev sim siab uas los rau kuv lub sij hawm ntawd mas yeej me me kawg thaum kuv xav txog tej uas tau los rau kuv thiab cov uas kuv hlub tom qab ntawd. Nej coob tug yeej raug kev sim siab ntawm sab cev nqaj daim tawv thiab ntawm sab ntsuj plig uas ua rau nej quaj thov zoo li Vajtsv ib tug tub qhev uas rau siab nntseeg uas kuv paub lawm. Nws tus nais maum hnov nws qv thaum nws mob hais tias: “Ua li cas tej yam no los rau kuv lawm thaum kuv tau sim ua zoo tag kuv lub neej lawm?”

Nej paub tias tus Tswv tau teb tus Yaj Saub Yauxej Xamiv li cas thaum nws nyob hauv tsev nkuaj. Nws hais tias:

“Thiab yog hais tias luag muab koj pov rau hauv lub qhov taub, los yog poob mus rau tej neeg tua neeg txhais tes, thiab raug luag txiav txim tias yuav muab koj tua; yog koj raug muab pov rau hauv dej tob; yog tej nthwv dej hiav txwv tuav hauv tawm

tsam koj; yog tej cua daj cua dub rais los ua koj tus yeeb ncuab; yog saum ntuj cia li tsaus tsaus, thiab yog txhua yam ntuj tsim koom siab los rhuav txoj kev; thiab txhua yam, yog hais tias ntuj txiag teb tsaus lub qhov ncauj kiag yuav qhib loj loj raws koj, koj yuav tsum paub, kuv tus tub, hais tias tag nrho tej yam no yuav ua rau koj kawm tej yam tshiab, thiab yuav zoo rau koj.

“Neeg Leej Tub tau txo hwj chim qis tshaj lawv txhua tus. Koj puas zoo dua nws?”

“Yog li ntawd, koj yuav tsum nyob twj ywm ntawm koj txoj kev, thiab lub pov thawj hwj yuav nyob nrog koj; vim lawv tej ciam twb muab teeb cia lawm, lawv hla tsis tau. Twb paub koj lub caij lub nyoog, thiab yuav tsis suav koj tej xyoo kom tsawg; yog li ntawd, tsis txhob ntshai tej uas neeg ua tau, vim Vajtsv yuav nrog koj nyob mus ib txhiab thiab ib txhis li.”²

Tus Tswv Nws tus Kheej, tus uas tau raug kev sim siab ntau tshaj peb txhua tus yuav paub, tau qhia meej lawm rau peb tias ua li cas tej kev sim siab thiaj los rau peb thiab thaum ntawd peb yuav tsum ua dab tsi.

Nej nco txog Nws tej lus thaum Nws ntuas peb tias peb yuav tsum rau siab ntseeg Nws, thiab hloov siab lees txim, hais tias:

“Yog li ntawd kuv txib koj kom cia li hloov siab lees txim—hloov siab lees txim, tsam kuv muab tus pas ntawm kuv lub qhov ncauj, thiab kuv txoj kev npau taws, thiab kuv txoj kev chim siab nplawm koj, ces koj tej kev txom nyem yuav mob heev—mob npaum li cas koj tsis paub, heev npaum li cas koj tsis paub, muaj tseeb tiag, nyuaj ris npaum li cas los koj tsis paub.

“Vim saib seb, kuv, tus uas yog Vajtswv, tau raug tej no rau tag nrho sawv daws, xwv kom lawv yuav tsis raug yog hais tias lawv yuav hloov siab lees txim;

“Tiam sis yog hais tias lawv yuav tsis hloov siab lees txim ces lawv yuav tsum raug kev txom nyem ib yam li kuv;

“Qhov kev txom nyem no uas tau ua rau kuv, tus uas yog Vajtswv, tus uas zoo tshaj plaws ntawm tag nrho sawv daws, kom tsee hnyo vim yog txoj kev mob, thiab los ntshav ntawm txhua lub qhov hws, thiab raug txom nyem ntawm sab cev nqaj daim tawv thiab sab ntsuj plig tib si—thiab tau ua kom kuv tsis xav haus lub khob dej iab, thiab tsum—

“Txawm li ntawd los, cia Leej Txiv tau lub yeeb koob, thiab kuv tau haus thiab tau ua tiav kuv tej kev npaj los mus rau noob neej sawv daws.”³

Nej thiab kuv ntseeg tias peb kov yeej peb tej kev sim siab vim peb ntseeg tias “muaj tshuaj nyob hauv cheeb tsam Nkile-as”⁴ thiab vim tus Tswv tau cog lus tias, “Kuv yuav tsis tso nej tseg.”⁵ Nov yog qhov uas Thawj Tswj Hwm Thomas S. Monson qhia peb kom pab peb thiab pab cov uas peb ua hauj lwm pab thaum peb raug tej kev sim siab uas peb xav tias peb kov tsis yeej los sis xav tias peb nyob peb ib leeg xwb.⁶

Tab sis mas Thawj Tswj Hwm Monson kuj qhia peb tias kev txhim tsa ib lub hauv paus ntawm kev ntseeg uas ruaj khov kho yuav siv sij hawm ntev. Tej zaum nej tau pom cov uas mob siab lawm uas yuav tsis thev mus txog hnuv kawg mas, lawv toob kas lub hauv paus no. Yog hais tias lub hauv paus ntawm kev ntseeg no tsis nyob hauv peb lub siab, ces yuav tsis muaj cuab kav thev mus txog thaum kawg.

Hnuv no kuv lub hom phiaj yog kom piav tias peb yuav tsum ua dab tsi kom txhim tsa lub hauv paus ruaj khov kho li no. Kuv txo hwj chim yuav qhia ob yam. Yam thib ib, tej zaum cov lus uas kuv hais yuav ua rau cov uas tab tom raug kev sim

siab kom lawv poob siab thiab xav tias lawv lub hauv paus tsis ruaj khov lawm. Thiab yam thib ob, kuv paub tias tseem muaj tej yam uas yuav sim kuv lub siab ua ntej kuv tso lub neej teb no tseg. Tej uas kuv hais no yog tej uas kuv tau kawm los lawm tiam sis kuv tseem tsis tau thev mus txog thaum kawg.

Thaum kuv ua ib tug tub hluas, kuv pab ua tej tsev tshiab thiab kho lawv tej lub hauv paus kom ruaj khov lawm. Thaum lub caij ntug sov nyuaj heev rau peb npaj tej av kom thiaj txais cov xe mees uas peb nchuav ua lub hauv paus tsev. Tsis muaj tshuab dab tsi los pab peb npaj cov av no. Peb tsuas siv cov rab daus thiab rab khawb xwb. Yav tas los lawm txoj kev ua tej lub hauv paus tsev mas yeej nyuaj heev.

Yus kuj yuav tsum ua siab ntev. Tom qab yus nchuav tej xe mees kom ua lub hauv paus cia lawm yus yuav tsum tos kom cov xe mees kho khov lawm. Txawm tias peb maj npaum li cas los thiab xav ua hauj lwm ntxiv los peb tseem yuav tsum tos kom khov mam li tshem cov ntoo uas tuav cov xe mees cia.

Thiab cov uas nyuam qhuav pib ua tsev lawv kawm paub tias yus yuav tsum ua siab ntev tshaj thaum yus muab cov pas hlau tso rau hauv cov xe mees kom lub hauv paus thiaj muaj zog dua ntais.

Thiab zoo ib yam li ntawd, peb yuav tsum npaj peb thaj teb zoo zoo kom peb lub hauv paus ntawm kev ntseeg thiaj muaj zog txaus kom nws tiv thaiv txhua yam uas yuav los sim peb siab hauv peb lub neej. Yam uas ua lub hauv paus ntawm txoj kev ntseeg twb yog txoj kev ua ncaj ncees.

Thaum peb xaiv qhov zoo tas mus li thaum twg ib yam los sim peb lub siab mas, nov yuav pab peb lub hauv paus ntawm kev ntseeg haj yam kho khov. Peb pib ua li no thaum peb tseem me me muaj Tswv tus Ntsuj Plig los pab peb. Tus Ntsuj Plig ntawd yuav pab peb paub tias peb puas ua qhov zoo los sis qhov tsis zoo nyob ntawm Vajtswv lub qhov muag.

Tej yam uas peb xaiv, ntau yam txhua hnuv, yog qhov uas npaj peb thaj teb zoo zoo kom thiaj ua tau peb lub tsev ntawm kev ntseeg. Tej pas hlau uas nyob hauv peb txoj kev ntseeg no mas yog Yexus Khetos txoj moo zoo nrog rau tej kev khi lus, tej kab ke, thiab tej ntsiab cai.

Ib qho uas yuav pab kom peb muaj kev ntseeg uas kav ntev mus yog kev paub tias nws yuav siv sij hawm ntev li cas kom thiaj ruaj khov. Vim li no kuv thiaj tsis muaj tswv yim zoo thaum kuv tseem hluas thiab kuv thov Vajtswv kom muab tej roob rau kuv nce thiab muab tej kev sim siab rau kuv.

Peb tos tsis tau txog ib hnuv ces ua ciav txawm muaj ib txoj kev ntseeg uas ruaj khov lawm xwb, nws yeej siv sij hawm ntev. Peb kuj tsis txais nws thaum peb laus laus lawm thiab. Tiam sis nws los thaum peb ib sij ua hauj lwm pab Vajtswv thiab luag tej tag peb lub siab lub ntsws, ces peb zaj lus tim khawv txog tej kev tseeb thiaj rais los mus ua ib qho uas muaj dag zog ntawm peb sab ntsuj plig.

Nim no, kuv xav ntuas nej cov uas tab tom raug kev sim siab, cov uas xav tias lawv txoj kev ntseeg tsis tshua khov lawm vim muaj kev kub ntxhov. Tej kev sim siab no yog ib qho uas yuav pab nej txoj kev ntseeg kom ruaj khov lawm. Maulaunais, Maumoos tus tub hauv Phau Ntawv Maumoos, qhia peb tias tej yam no los li cas lawm rau peb. Nws qhia peb tias yog peb muaj kev cia siab rau Vajtswv ib nyuag qhov lawm ces peb txais tau:

“Thiab nim no, kuv, Maulaunais, yuav hais me ntsis txog tej yam no; kuv yuav ua rau ntiaj teb paub tias txoj kev ntseeg yog tej yam uas cia siab rau thiab tsis pom; yog li ntawd tsis txhob cam vim nej tsis pom, vim nej yuav tsis pom ib qho tim khawv mus txog thaum nej txoj kev ntseeg twb raug muab sim lawm tso.

“Vim nws tau yog los ntawm txoj kev ntseeg uas Khetos tau ua nws tus kheej rau peb tej yawg koob pom, tom qab uas nws tau sawv hauv qhov tuag los; thiab nws tsis tau ua rau lawv

pom nws mus txog tom qab uas lawv tau muaj kev ntseeg nyob hauv nws; yog li ntawd, nws yeej yuav tsum yog tias ib txhia tau muaj kev ntseeg hauv nws, vim nws yeej tsis tau ua nws tus kheej rau ntiaj teb pom.

“Tiam sis vim yog tib neeg txoj kev ntseeg nws tau ua nws tus kheej rau ntiaj teb pom, thiab tau qhuas Leej Txiv lub npe, thiab tau npaj ib txoj kev xwv kom los ntawm qhov ntawd lwm tus yuav tau ua cov uas tau txais tej txiaj ntsim saum ntuj, xwv kom lawv yuav cia siab rau tej yam uas lawv tsis tau pom.

“Yog li ntawd, nej los kuj yuav tsum muaj kev cia siab, thiab ua cov uas tau txais qhov txiaj ntsim ntawd, yog nej tsuas yuav muaj txoj kev ntseeg.”⁷

Hais txog tag nrho nej txoj kev ntseeg mas, qhov uas nej yuav tsum siv tag li yog nej txoj kev ntseeg tus Tswv Yexus Khetos. Maulaunais qhia txog peb txoj kev ntseeg li no, hais tias: “Thiab ib txwm tsis muaj ib lub sij hawm uas muaj tau tej txuj ci tseem ceeb mus txog tom qab uas lawv muaj txoj kev ntseeg; yog li ntawd, lawv yeej xub ntseeg Vajtswv Leej Tub tso.”⁸

Kuv tau mus xyuas ib tug poj niam uas muaj zog heev muaj peev xwm nyiaj tej kev sim siab, nws tsuas tej lus me me hais tias “Kuv paub tias kuv tus Cawm Seej nyob tiag”⁹ ces nws nyiaj los tau. Nws txoj kev ntseeg no thiab nws tej lus tim khawv no yeej ruaj khov lawm txawm tias nws laus lawm thiab tsis tshua nco txog nws lub neej thaum nws tseem hluas.

Kuv kuj xav tsis thoob thaum kuv kawm paub txog lwm tus poj niam uas tau zam txim rau ib tug uas ua tsis zoo rau nws rau ntau xyoo lawm. Kuvxav tsis thoob thiab noog nws saib nws ua tau dab tsi kom thiaj zam txim li no txawm twb ua txhaum rau nws ntau xyoo los lawm.

Nws teb tias, “Qhov ntawd yog qhov nyuaj tshaj plaws. Kuv tsuas paub tias kuv yuav tsum zam txim. Yog li ntawd kuv txawm ua li ntawd xwb.” Nws txoj kev ntseeg tias tus Cawm Seej zam tau peb lub txim yog qhov uas pab nws zam txim rau nws tus yeeb ncuab es ua

rau nws muaj kev thaj yeeb nyab xeeb thiab kev cia siab thaum nws yuav tso lub neej no tseg ob peb hlis tom qab nws zam txim tas.

Nws nug kuv hais tias, “Thaum kuv mus txog lawm, yuav ua li cas thiaj yog ntuj ceeb tsheej?”

Thiab kuv tias, “Kuv paub vim kuv twb pom koj txoj kev ntseeg lawm thiab koj txoj kev txawj zam txim koj thiaj yuav muaj kev zoo siab heev thaum koj rov qab mus tsev no.”

Kuv kuj muaj lwm cov lus ntuas rau cov uas tsis paub tias lawv tej kev ntseeg Yexus Khetos puas txaus kom thev mus txog hnuv kawg. Kuv tau koob hmoov vim kuv tau paub nej ib co thaum nej tseem hluas, muaj zog, thiab muaj ntau tshaj cov uas nyob ncig nej, tiam sis txawm li ntawd los nej tseem txiaj txim siab ua tej uas tus Cawm Seej yuav ua. Txawm tias nej muaj ntau nplua mias los, nej tseem tau pab cov uas tsis muaj npaum li nej.

Thaum tej kev sim siab los, nej yuav muaj txoj kev ntseeg txaus uas yuav pab nej nyiaj dhau tej kev sim siab, vim nej tau ua li Yexus yuav ua. Nej tau pab thiab zam txim rau luag zoo li tus Cawm Seej yuav ua. Nej tau txhim tsa ib lub hauv paus ruaj khov vim nej tau hluv thiab ua raws li tus Cawm Seej hais. Nej txoj kev ntseeg Nws yuav pab nej muaj kev cia siab.

Yeej tsis lig dhau rau nej tau txhim tsa nej lub hauv paus ntawm kev ntseeg. Yeej tshuav sij hawm. Yog tias nej ntseeg tus Cawm Seej, nej mauj cuab kav hloov siab lees txim thiab thov kom tau kev zam txim. Yeej muaj lawv cov uas koj zam tau lawv lub txim thiab. Yeej muaj cov uas koj hais tau ua tsaug rau. Yeej muaj lawv cov uas koj pab tau. Nej ua tau tej yam no nyob qhov twg los tau thiab txawm tias nej tau raug kev tu siab npaum twg lawm los xij.

Kuv cog lus tsis tau tias nej yuav tsis raug kev sim siab. Kuv hais tias tau tias nej tej kev sim siab yuav nyob ib pliag xwb. Tej yam uas sim peb siab mas, nws zoo li ib lub moo uas tsis ua hauj lwm ntxiv nws nyob nyob mus tsis txawj tas.

Yeej muaj ib lub ntsiab lus rau qhov no. Tej yam uas sim peb siab mas ib txwm tsis nplij peb siab, tiam sis qhia kom peb muaj siab ntev. Peb raug kev sim siab vim li no: Peb Leej Txiv Saum Ntuj thiab peb tus Cawm Seej hluv peb tag npaud tias Nkawd xav kom peb ua tsev neeg nyob ua ke nyob mus ib txhis. Cov uas raug ntxuav kom huv lawm los ntawm Yexus Khetos txoj kev Theej Txhoj thiaj ua tau li no.

Kuv niam raug mob cancer rau 10 xyoo. Tej uas sim nws lub siab mas yog tej tshuaj thiab tej kev phais thiab thaum kawg txoj kev nyob twj ywm pw hauv txaj xwb.

Kuv nco txog tej uas kuv txiv hais thaum kuv niam tso lub neej no tseg, nws hais tias, “Tus me ntxhais no rov qab mus tsev kom thiaj so.”

Nws tus txiv hluas Thawj Tswj Hwm Spencer W. Kimball tau hais lus hauv nws txoj kev pam tuag. Nws hais ntau yam zoo, tiam sis kuv nco txog thaum nws hais tias: “Tej zaum muaj nej ib co uas xav tias Mildred no tau raug kev sim siab ntev li no vim nws tau ua dab tsi hauv nws lub neej uas ua rau nws raug kev sim siab. Tiam sis tiag tiag mas, Vajtswv xav npaj nws zoo dua.”

Yog tias peb ntseeg Yexus Khetos, peb yuav txais koob hmoov hauv tej lub caij nyuaj thiab tej lub caij yooj yim huv tib si. Txhua lub sij hawm, peb muaj cuab kav xaiv tau yam zoo thaum peb cia tus Ntsuj Plig coj peb kev. Peb muaj Yexus Khetos txoj moo zoo los pab peb thiab coj peb kev yog peb txiaj txim ua li ntawd. Thiab peb txais tau kev thaj yeeb nyab xeeb vim peb muaj cov yaj saub uas niaj hnuv qhia peb txog peb txoj kev cawm seej peb thiaj muaj tau kev cia siab thiab kev thaj yeeb nyab xeeb. Thiab peb yeej tsis nyob peb ib leeg xwb vim peb muaj cov uas nrog peb nyob. Peb txais tau tus Tswv txoj kev hluv. Tus Cawm Seej tau cog lus tias Nws yuav txib tej tim tswv los nyob ntawm peb sab laug thiab sab xis kom txhawb nqa peb.¹⁰ Thiab Nws yeej ua raws li Nws cog lus tseg lawm.

Kuv ua tim khawv tias Vajtswv peb Leej Txiv nyob thiab tias Nws Tib Leeg Tub yog peb tus Txhiv Dim. Tus Vaj Ntsuj Plig Dawb Huv tau qhia qhov tseeb hauv lub tuam rooj sab laj no thiab yuav ua ib yam tom ntej thaum nej kawm tus Tswv cov tub qhe tej lus. Thawj Tswj Hwm Thomas S. Monson yog tus Tswv tus yaj saub hauv lub ntiaj teb no niaj hnuv nim no. Kuv ua tim khawv li no los ntawm Yexus Khetos lub npe zoo, a-meets.

LUS CIM

1. Spencer W. Kimball, "Give Me This Mountain," *Ensign*, Kaum Ib Hlis Ntuj 1979, 79.
2. Doctrine and Covenants 122:7–9.
3. Doctrine and Covenants 19:15–19.
4. Yelemis 8:22.
5. Tsosua 1:5.
6. Saib Thomas S. Monson, "Look to God and Live," *Ensign*, Tsib Hlis Ntuj 1998, 52–54.
7. Ethaws 12:6–9.
8. Ethaws 12:18.
9. "I Know That My Redeemer Lives," *Hymns*, naj npawb 136.
10. Saib Doctrine and Covenants 84:88.

© 2012 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam tawm ua lus As Kiv: 6/11. Pub txhais ua lus Hmoob: 6/11. Kev txhais *Visiting Teaching Message, May 2012*. Hmong. 10365 295